

武州荒藺崎桃雲寺碑銘

弘文院學士林子撰

武州荏原郡荒藺崎者木原氏累世之采邑初鈴木氏吉次在遠州領木原邑奉仕

東照大神君 神君常稱木原其後天野康景奉 旨使吉次改為木原氏迨闔國一統之時移住江府掌營構之事指揮宮工辱賜荒藺崎以為食邑既而老休号桃雲其子重次其孫家次承繼其事而共早世家次子義久幼而孤号木工及壯長奉仕

大猷院殿以家事揚其名加賜食祿邑內有古寺寺辺有堂安藥師仏世伝自鎌倉移焉義久暇日自江府來此采邑相攸營宅地移寺於其中既而義久沒矣其子義永号内匠克其家受采邑卜地於堂東新築吉次至義久四世墳墓而修復其寺以桃雲名焉其不忘遠之孝志可以嘉矣此地於江城之南三里而路自品川通輿馬絡繹其前面画東西有田畝萌動秀実耕耨収藏各不違時南則房綫之海水天一色遠帆千里浩浩無限鈴森之神祠不入斗大森之民戸相接於辰巳午之間而六郷之橋矢口之渡斜連於未申酉之際而多磨川之長流溶溶漾漾西則池上之蘭若高聳巍然乾隅即高岡堆堆岡有古松歌林所謂荒藺崎之磯馴松者是也云北則江城千門万戸擎曰蔽空況其遠望土峯之雪於兌遥指筑波之陰於震勝景之多壯觀之美不易言也擇此佳境以營冢域即祖考之靈可以安幽魂乎嗚呼義永弥勵其力而守其分不辱祖考之名使此采邑与墳墓共乘雲仍即孝道其庶幾乎方今請建碑記其事余与義永奕世相知所居同開且感其報本之志遂塞其求系之以銘銘曰

荒藺之松 千歲其秀 桃雲之寺 春風依宿 維祖維考 墳墓新就

不志其先 永伝於後

寛文四年甲辰十一月二十日

木原内匠義永立之

(左側面) 奉行 青嶋左兵衛尉

三  
明